





明代名人年譜



于浩輯

北京圖書館出版社

于浩輯



明代名人年譜



9



北京圖書館出版社

馬其昶編 民國十四年刻本

左忠毅公年譜定本

第九冊目錄

左忠毅公年譜定本(左光斗)	二卷	馬其昶編	一
黃忠端公年譜(黃尊素)	二卷	年譜舊本一卷 (清)黃炳垕編	八九
周吏部年譜(周順昌)	一卷	(明)殷獻臣編	二〇五
文貞公年譜(繆昌期)	一卷	(清)繆之榕編	三四九
海澄周忠惠公自叙年譜(周起元)	一卷	(明)周起元編(清)王煥(清)王如續編	四〇一
魏廓園先生自譜(魏大中)	一卷	(明)魏大中編	四五九
徐文定公年譜(徐光啓)	一卷	(清)徐允希(清)李杅編	五四一
袁中郎年譜(袁宏道)	一卷	佚名編	五四七

左忠毅公年譜序

其祖嘗恭閱欽定明史藝文志左光斗奏疏三卷文集五卷後求諸左氏得公子國材舊刊本凡奏疏二冊尺牘雜文一冊詩一冊又得祠堂本缺尺牘雜文據公子國材跋稱公遭禍時家人取所著稿投火卽典兵疏與二魏交通三十二可斬等疏皆不存蓋史志所據猶明季人親見公全書故卷衷視今多又有四書文及周易文內外篇別行其昶今重編公集奏疏仍二卷諸本雜廁互異今案時事年月次其先後尺牘雜文分二卷古近體詩四書文又各二卷雖不能復史志所載之舊然大略具此矣忠毅年譜上下兩卷公會孫宰所編也宰字雒三康熙辛卯舉人爲

福建建陽令有治績其紀移宮始末及在獄事甚具自云
本家藏舊稿及同難諸公所記有史所未詳者惜所考他
事猶疏舛文不雅馴取舍失要故四庫全書未著錄其祠
嘗與外舅姚慕庭先生審正義例博考遺文證之明史及
諸家傳狀碑誌刺取而要刪之仍爲兩卷曰年譜定本附
公集後寄天津廣仁堂刊行蓋公之所遭亦極難矣其平
生志事之所得伸者惟力爭李選侍移宮而宸極獲正出
按畿輔而興水利開屯學講武備拔史公可法而造成其
材而一時畿輔諸賢如定興鹿太公宣城孫徵君等亦莫
不慷慨奮發急公之難人之云亡邦國殄瘁故高陽孫文
正公爲三十五忠詩以寄其慨於戲觀公師弟朋友患難

死生相與之誼甚足悲也是公之大節在天壤而靈爽所
憑式未嘗不於畿輔尤惓惓焉然則刊公集於茲土也儻
亦有篤古奇傑之士聞聲興起而曠代相感者與父友蕭
敬孚曰公晚歲於易特深造見於方中丞孔炤周易時論
中者其陳義皆精道光間湘鄉左君春輝刊公集稱易經
制裁嗣出似當時猶有全稿今不知其存亡由是觀之公
選述之不盡傳世者固非僅奏疏文集卽其潛德隱行如
高陽所云遠志包寰區者又豈茲譜之所能盡哉光緒癸
未夏桐城馬其昶

左忠毅公年譜定本

桐城馬其昶通白纂

卷上

公姓左氏諱光斗字共之一字遺直號浮邱又號蒼嶼
南直隸安慶府桐城縣人其先由涇縣徙潛山洪武初
遷居桐城橫埠河五傳至松坡公麒以俠聞邑中蘆課
重民多逋欠繫獄憫而代輸不足則借貸仍不足則鬻
產明年官追課如前乃謀額減課上書闕下誓以死爲
民請命抵闕前一日家僮左恩竊疏上之恩死於交戟
之下麒蒙召見允奏減課額十之三著爲例邑人德之
是爲公曾祖也祖諱軫父諱出穎號碧衢皆以公貴封

中議大夫追贈太子少保都察院右都御史祖母章氏
母周氏皆封恭人追贈夫人碧衢公潛修力學以行誼
高鄉里生子九人公次居五時有九龍之目孫及曾孫
百有餘人子姓之盛一時無比

見桐城縣志及左氏家譜

明神宗萬歷三年乙亥秋九月九日丑時公生於桐城縣

東鄉之居宅

蕭敬孚先生穆日宅名大朱莊至今老屋尚有存者

始誕紅光繞舍

隣人望之以爲火災輒無有如是者再封公以是時

月宿在斗故因以命名焉

見公會孫幸原編年譜後凡不載所出者皆是

八年庚辰公六歲始就塾公生而岐嶷讀書過目數十行

無所留滯同館有侮之者緘寸楮訴於師已井井成文
聞取同學課藝點閱封公竊見以爲妄視之無誤心器

之而終謂非穉子所宜語其師曰吾先世多隱德後有
達者其在此兒乎但虞一躍冶便元氣盡矣向後須尋
過誤扑繩之此究竟受用也

十一年癸未公九歲能屬文時大饑家人食粥因作粥賦
嘗隨封公課耕封公命試作破題卽對曰播厥百穀王
道之始也

十六年戊子公十四歲窗前生麥一莖三穗作瑞麥賦上
太守趙公祖壽趙戲曰此麥北方常有公應聲曰北常
有則常南不常有則瑞矣太守聳然異之

二十一年癸巳公十九歲應縣試時黎公道炤已奉行取
猶領試事拔冠其曹及院試復被黜徐太守民式爲力

爭之督學乃搜所落卷亦稱奇而惜其畱良焉

二十二年甲午公二十歲館於戴公完宅與其諸子若孫
下帷三年脈脈有得公少豪邁負氣好購奇書不計直
聚書數千卷獨喜觀古節俠諸傳記中夜臨卧輒朗誦
一過以爲常旣而翻然求程朱之學以自勉曰是可以
安身立命也

見左氏
家傳

二十四年丙申公二十一歲補博士弟子員督學爲陳公
子貞稱公之文爽氣清健自後試輒高等公自言生平
無時文之嗜古文正不欲作碎瑣之學自家邱明及子
長昭明選莊蘇外亦無雜嗜云

見與
人書

二十五年丁酉公二十三歲娶周氏夫人夫人爲公母黨

周公諱時興字起吾之女時年十八克脩婦道鄉里稱之封公延師課子竭力以供束脩家益落公乃發憤督課諸弟竝遙收生徒以資筆墨每語人曰貧家無樂事惟三六九日見諸弟各成一藝便欣然忘寢又嘗自謂一身前擔四兄後擔四弟何以釋然而無憾乎

二十八年庚子公二十六歲舉南直應天鄉試第十一名房師爲浮梁陳公大綬初謁勉之自樹卻紅柬不受謂今日行事之儉卽異日居官之清不從此立定脚跟便無措手處公奉教唯唯益圖所以自勵焉

公一日與諸弟飲隣家夜

歸見屋上火光燭天知有喜慶事秋果與戴公兩孫同榜

初封公讀史嘗手輯漢

宋黨禍成書名曰讀史拾餘至是公初第卽舉以授之

雲閒陳子龍夏允彝讀而歎其絕識以爲此諸子忠孝

之所自出也

見桐城志及家譜

二十九年辛丑公二十七歲會試不第歸里

三十二年甲辰公三十歲會試不第公兩下第歸益以課

諸弟爲業館穀衣履或貧甚不給則周夫人下簪釵佐

之封公及太夫人每謂諸子何以無負兄嫂也

其後諸弟試輒

躡往返踰躋類公少時進試日公必衣冠焚香拜家廟中雖遠不廢

三十三年乙巳公三十一歲周夫人卒

三十四年丙午公三十二歲繼娶戴氏夫人夫人爲戴公

完孫女

桐城志戴完字仲脩嘉靖甲辰進士官刑部郎時嚴嵩冀其私謁竟不往會同部郎張劭劾嵩

杖戍嵩偵其疏與完令

草遂出補貴州僉事父諱君祐時年二十一賢淑與

周夫人同自公起家行人數厯僉院夫人皆侍親家居

視膳問寢無閒

見桐城志

十月長子國柱生

桐城志國柱字子正號碩

人崇禎己卯副榜官浙江武康縣知縣甲申挂冠歸隱與諸弟皆以學行著稱號龍眠四傑鄒公維璉撰墓表云長子國柱就試公致書縣令求勿前置曰穉子居老成先吾弗安且鬻貧士嚮往路矣

三十五年丁未公三十三歲春登王士俊榜進士第十一

名房師爲李公允昌

殿試三甲九十一名賜同進士

出身 十月拜內閣中書舍人公署聯於堂云俸薄儉

常足官卑清自尊嘗與張公懷卿書云某十月例得中

翰職此官頗閒而冷閒可藏拙冷則吾素也引分營職

可幸無戾又答同鄉廷尉方魯岳魯曰人臣精白乃心

靖共爾位何官不可致身豈必金馬纔堪託足哉觀此

二書公之居官立身已可概見矣

三十六年戊申公三十四歲奉差封益府過里省覲值邑中大水族人嗷嗷封公愀然不懌公乃稱貸買麥賑三黨老弱更倡義畫策與邑令同心拯救多賴保聚

三十九年辛亥公三十七歲奉差祭葬奉新蔡太宰國珍公兩奉使絕饋遺不入是歲邑中復大水糴麥設賑如前或謂非窮官所辦公愀然曰不記十六七年游饑乎吾父穠蓁荒洲母嚙指數米薄粥不充兒女菜色而親屬尙待舉火死爲具棺殮無怠容豈吾有一官而反難之言者謝不敏 公外舅周公家故饒無子晚年娶妾更遣去五月而生子乃贖之歸周歿族人覬覦之搆獄

以半產陷公公曰伐國不問仁人此言何爲來哉力白之當事尺寸悉入印冊付遺孤岐更延師教讀成立之

後督師史公可法薦爲監軍道僉事

桐城志周岐字農父著名復社明史

史可法傳崇禎十七年

遵義知府何剛上書言練兵事因薦幾塘進士

周岐帝壯其言

四十年壬子公三十八歲娶側室袁宜人

宜人爲儀徵生員袁孟新女年

十四侍公有中饋才從公於官經理內外無不當公被

璫禍宜人年二十七自經以家人救不死時坐賊二萬

有惟宜人織紉是資昭雪後躬親炊汲及封公及太夫人

嘉其賢命國柱國標事之如母桐邑民變避亂金陵每

日閒舉一火而畫荻之訓未嘗暫輟子國材國材文章

氣節重海內蓋得母教

四十年癸丑公三十九歲擢御史臺候命歸里

公性

好山水築書室於龍眠手題其外曰此處有伏龍鳳雛